



**Pangilin sa Santisima Trinidad
(Adlaw sa mga Amahan)
Hunyo 15, 2014**

**Ma-Dominggong Tamdanang Litrhikal alang sa
Simbahan sa Kabus sa Diwa sa Bag-ong Ebanghelisasyon**

Ang Simbahan sa Kabus, pinaagi sa Gagmayng Simbahanong Katilingban, makisanati sa pinakadakung kalipay kon ang iyang solidaridad sa tanang mga tawo nakagamut sa grasya ni Kristo, diha sa gugma sa Diyos ug sa panaghiusa sa Espiritu Santo: sa mahigugmaong komunyong sa Trinidad!

Atong saulogon karon ang Pangilin sa Santisima Trinidad. Human sa hingpit nga pagpa-ila sa Anak (sa iyang Pagkabanhaw ug Pagsaka sa Langit) ug sa pagkunsad sa Espiritu Santo (Pentekostes), makab-ot na nato ang Santisima Trinidad (Tulo ka Personas sa Usa Diyos) nga mas sayon kay sa kaniadto. Ang Amahan ang magbubuhat, ang Anak ang manunubos ug ang Espiritu Santo ang magbalaan. Ang Amahan ang nagpadala, ang Anak ang gipadala, ug ang Espiritu Santo gikan sa Amahan ug Anak. Mainiton natong pamalandongan kining misterio sa Santisima Trinidad ug ang iyang naturang panaghiusa, ug unsay labot niini sa inadlaw-adlaw natong kinabuhi. Bahin sa misyon ni Jesus, miingon ang PKP-II:

“6. Ang Misyon sa Pagpalabi sa mga Kabus

(48) Ang ilang (sa Dose) pagsangyaw sa Nindot nga Balita nagasunod sa han-ay sa pamaagi ni Jesus, ang iyang espesyal nga pagpalabi sa mga nasakitan, sa mga gipadaplin, sa mga uyamot, sa mga makasasala – ang mga kabus. Ang tibook niyang kinabuhi saksi man niining gugmang nagpalabi sa kabus. Nahimo siyang kabus alang kanato aron sa iyang kawad-on mahimo kitang adunahan. Ang una niyang gibulahan mao man ang mga kabus: ‘Bulahan kamong mga kabus!’ Gipili niya ang mga kabus nga mga mangingisda nga mahimong iyang unang mga sumusunod. Iyang gipuy-an ang kinabuhi sa usa ka magsasangyaw nga nagapanaw kanunay ug walay kaugalingong puluy-anan. Ug sama sa iyang pagpakabuhì, mao man usab ang iyang pagkamatay – kabus, gilubong sa lubnganan nga dili man gani iyaha.

RITO SA PAGSUGOD

P: Sa ngalan sa Amahan ug sa Anak ug sa Espiritu Santo.

K: *Amen.*

P: Ang Amahan nga mabubuhat, ang Anak nga manluluwas ug ang Espiritu Santo nga tig-balaan ug tighatag ug kinabuhi maanaa kaninyo.

K: *Maanaa usab kanimo.*

(49) Dili lamang ang mga kabus sa materyal ang iyang gipalabi sa paghigugma. Nagkanunayan siya sa mga pundok niadtong nangita kaniya sa kakabus sa ilang espiritu, ang mga kabus sa moralidad, ug kadtong wala matudloi bahin sa balaod. Iyang gideklara nga dili kadtong mga maayo ug lawas ang nagkinahanglan ug doktor, kon dili kadtong mga masakiton. Wa man gani siya moanhi aron tawgon ang mga tul-id kon dili ang mga makasasala aron maghinulsol. **(50)** Iya usab gipakita ang iyang paghigugma sa mga kabataan ug mga kababayan-an, duha ka hut-ong sa mga tawo nga giisip ‘gamay’ sa katilingban niadtong panahona. Sa dihang gidid-an sa mga disipulo ang mga inahan nga dalhon ang ilang mga bata ngadto kanila, gisaway niya ang iyang mga disipulo: ‘Paduola ang mga bata ngari kanako ug ayaw sila’g santaa...’ Ug iyang gihimo ang mga bata nga panig-ingnan sa mga mosunod kaniya.

(51) Samtang ang mga kababayan-an segunda klaseng mga lumulupyo sa katilingban ni Jesus, iyang gipakita ang tumang pagtahod kanila ug mihugoyhugoy siya sa mga babaye sa iyang pagpangalagad. Iya man ganing gipili ang mga babaye nga maoy unang testigo sa iyang pagkabanhaw. **(52)** Kining gugma sa pagpalabi nga iyang gipakita ngadto sa mga uyamot ug kabus buot usab niyang sundon sa iyang mga disipulo. Sa kaulahian, miingon siya kanato, ang atong padulngan nga walay kinutuban nag-agad sa kung giunsa nato pag-amoma ang atong pinakaubos nga mga kaigsoonan (Mat 25:40.45) .

Nagaambit ba ang inyong GSK sa kang Jesus nga paghigugmang nagpalabi sa mga kabus ug mga uyamot? Karon atong pasalamatang ug pahalipayang ang atong mga amahan sa ilang bayanihon ug balaang papel sa atong mga kinabuhi. Sa atong paghimo niini, kita usab mangutana kanila: Mga Amahan karon, buot ba usab kamong mosunod sa kang Jesus nga paghigugmang nagpalabi sa mga kabus ug itudlo kining maong Jesus ug ang iyang madapigong gugma sa mga kabus ngadto sa inyong mga anak? ■

Pasiuna ug Pag-abi-abi

Mga minahal kong mga igsoon: ipadayon nato ang pagsaulog sa atong kinabuhi nga malipayon ug mapasalamaton isip Simbahan, isip katilingban sa katawhan sa Diyos. Karon, atong espesyal nga iampo ang grasya nga makaapil unta kita nga mas maikagon sa halawom nga mahigugmaong komunyong nga gisalohan tali sa Amahan, ug Anak ug Espiritu Santo isip Santisima Trinidad.

Akto sa Paghinulsol

P: Mga igsoon, atong pangayoon karon sa Diyos ang iyang pasaylo sa atong mga sala, aron mahimo kitang takus sa pagsaulog niining mga balaang misteryo.

P: Nagakumpisal ako...

*K: Sa Diyos makagagahum sa tanan
Nga inyo unta akong iampo sa Ginoo nga atong Diyos. Amen.*

P: Kaloy-an unta kita sa Dios...ngadto sa kinabuhing walay katapusan.

K: Amen.

P: Ginoo, kaloy-i kami.

K: Ginoo, kaloy-i kami.

P: Kristo, kaloy-i kami.

K: Kristo, kaloy-i kami.

P: Ginoo, kaloy-i kami.

K: Ginoo, kaloy-i kami.

Himaya sa Diyos didto sa langit...

Kolekta

P: Mag-ampo kita: O Diyos, kinsa pinaagi sa imong pagpadala nganhi sa kalibutan sa Pulong sa kamatuoran ug sa Espiritu sa kabalaan nagpaila sa katawhan sa imong katingalahang misterio, ihatag kanamo, naga-ampo kami kanimo, nga sa among pagpadayag sa usa lamang ka-pagtoo, amo untang angkonon ang Trinidad sa himayang walay katapusan ug yukboan ang inyong Kahiusahan, gamhanan sa kamahalan. Pinaagi sa among Ginoong Jesukristo, imong Anak, nga buhi ug hari uban Kanimo diha sa kahiusahan sa Espiritu Santo, Dios nga usa, hangtud sa kahangturan.

K: Amen.

LITURHIYA SA PULONG

Unang Pagbasa: Eks 34:4b-6,8-9

L: Ang Pagbasa gikan sa Eksodo.

(Basahon gikan sa Kasulatan)

L: Ang Pulong sa Ginoo.

K: Salamat sa Dios.

Komentaryo sa Eks 34:4b-6,8-9:

Hayan asoy kini nga Yahwista nga nagpaila sa pagbag-o sa Kasabotan nga sa kanunay gilapas sa Israel sa kanhiay. Gikuha ni Yahweh ang inisyatiba sa paghimo ug bag-ong Kasabotan; iyang gipaila ang iyang kaugalingon isip Ginoo, maloloy-ong Diyos, hinay masuko ug bahandianon sa kalomo ug katiunay. Bantayi: iyang gitudlo si Moises nga maoy nakaingon sa pagkapusgay sa unang duha ka papan sa balaod. Sa naulahing konprontasyon tali sa bulawang nating baka (timaan sa idolatriya sa karaang pamatasan, karaang pamaagi sa pagpakabuhi) ug sa duha ka papan sa 10 ka Sugo (timaan sa mga bag-ong paglaom, sa bag-ong pamaagi sa pagpakabuhi, ang Bag-ong Balaod ni Yahweh alang sa iyang katawhan), ang papan sa mga Bag-ong Paglaom napusgay diha sa mga kamot niya nga midawat niini; ang papan sa bag-ong mga paglaom ug ang bulawang nating baka sa karaang pamatasan gigun-ob ni Moises nga mingpuli sa kasukong nagdilaab sa Diyos! Apan ang nagdilaab nga kasuko sa Diyos mahimong mausab ngadto sa kalooy, tungod sa ang iyang kalomo, kaaghop ug katiunay. Siya lamang ang bugtong makapasaylo ug makasilot sa iyang katawhan. Apan ang pagpabalik sa katawhan pinaagi sa bag-ong kasabotan dili lamang usa ka pagbag-ong espirituhanon. Pagbag-o usab kadto nga materyal ug pisikal, kay sa pagkatinuod ang Dekalogo gisulat man sa papang materyal nga bato!

Salmo Responsoryo: Dan 3:52, 53, 54, 55, 56

(Basahon gikan sa Kasulatan)

Komentaryo sa Dan 3:52, 53, 54, 55, 56:

Kining mga berso tipik sa Awit sa Tulo ka mga Ulitawo sa basahon ni Daniel. Kining mga bersoha usa ka awit sa pagdayeg sa usa lamang ka Diyos; niining bahin, usa usab kini ka pagdapit nga ihunong ug biyaan ang pag-ampo sa bulawang estatuwa. Usa lamang ang Diyos nga manluluwas. Siya lamang ang yukboan sa tanan.

Ikaduhang Pagbasa: 2 Kor 13:11-13

L: Ang Pagbasa Gikan sa Ikaduhang Sulat ni San Pablo ngadto sa mga taga-Korinto.

(Basahon gikan sa Kasulatan)

L: Ang Pulong sa Ginoo.

K: *Salamat sa Dios.*

Komentaryo sa 2 Kor 13:11-13:

Mao kini ang katapusang panamilit ni Pablo sa Kristohanong katilingban sa Korinto. Impersonal, mubo ug, lahi sa ubang katapusang panamilit sa uban niyang mga sulat, dinhi walay siyay gihisgotan nga tawo. Kining maong pagka-impersonal nagapunting sa uyukang tinubdan sa kalipay ug kalinaw nga gikinahanglan kaayo sa Kristohanong katilingban: ang Diyos sa gugma ug kalinaw. Ang pagtimbaya sa matag-usa sa katilingban gihiusa na sa solidaridad uban sa tanang sakop sa Simbahan. Silang tanan gigrasyahan sa Trinidad nga gihubit ni Pablo sa tin-aw nga pormulang Trinidad: ang grasya sa atong Ginoong Jesukristo, ang gugma sa Diyos ug ang panaghiusa diha sa Espiritu Santo.

Berso sa Aleluya:

T: **Aleluya, aleluya.** Himaya sa Amahan, sa Anak, ug sa Espiritu Santo; sa Diyos nga ania karon, ang sa kagahapon ug ang umaabot!

T: **Aleluya, aleluya.**

Ebanghelyo: Juan 3:16-18

P: Ang Ginoo maanaa kaninyo.

K: *Maanaa usab kanimo.*

P: Ang Santos nga Ebanghelyo sumala ni San Juan.

K: *Himayaon ikaw, O Ginoo.*

(Basahon gikan sa Kasulatan)

P: Ang Ebanghelyo sa Ginoo.

K: *Daygon Ikaw, O Kristo.*

Komentaryo sa Juan 3:16-18:

Kining tekstoha tipik sa sugilanon mahitungod sa panagtagbo ni Jesus ug ni Nikodemo. Gipaila-ila ni Juan si Nikodemo nga Pariseo ug inila sa mga Judiyo. Sa pagkabalintuwang, si Nikodemo nahimo naman hinoong magtutuo, ug si Jesus, nga iyang gitawag ug Rabbi, nahimo na mang magtutudlo. Niining ilang pagkulokabildo, inanay nga gitultolan ni Jesus si Nikodemo ngadto sa mas halawom nga pagsabot sa Gingharian sa Diyos. Unya, gipunting sa maong teksto ang hinungdan bahin sa kahigayonan sa katawhan nga mosulod sa kinabuhing dayon: ang di-mabangbang nga gugma sa Diyos sa kalibutan nakatukmod kaniya sa pagpadala sa iyang bugtong Anak aron luwason ang kalibutan. Kining buhata sa Ginoo nagadapit sa tubag sa pagtoo.

Please help us continue publishing this Missalette with your donation.

Any amount is appreciated
no matter how small.

Thank you!

Account Name:
Communication Foundation for Asia
Metrobank V-Mapa, Sta. Mesa,
Manila Branch:
SA# 3306-509-480
BDO Old Sta. Mesa Road, Manila Branch:
SA# 7090-042-836

Please fax deposit slip to 713-2736
We are located at # 4427 Old Sta. Mesa St.,
Sta. Mesa, Manila

Wali: Ang Simbahan sa Kabus, pinaagi sa Gagmayng Simbahanong Katilingban, makisanati sa pinakadakung kalipay kon ang iyang solidaridad sa tanang mga tawo nakagamut sa grasya ni Kristo, diha sa gugma sa Diyos ug sa panaghiusa sa Espiritu Santo: sa mahigugmaong komunyong sa Trinidad!

Sumadang Mensahe sa mga Pagbasa sa Dominggo	Ang Simbahan sa Kabus: Konkretong Hulagway sa kabus ug sa ilang kahimtang	Mga Puntos para sa Pamalandong/ Panawagan/ Hagit
<p>Ang Simbahan sa Kabus, pinaagi sa Gagmayng Simbahanong Katilingban, makisanati sa pinakadakung kalipay kon ang iyang solidaridad sa tanang mga tawo nakagamut sa grasya ni Kristo, diha sa gugma sa Diyos ug sa panaghiusa sa Espiritu Santo: sa mahigugmaong komunyong sa Trinidad!</p>	<p>Ang inyo bang GSK adunay espesyal nga programa alang sa mga nasakitan, sa mga gipadaplin, sa mga uyamot, sa mga kababayen-an ug mga kabataan, sa mga kabus sa materyal nga butang ug sa mga adunahan nga midawat sa ilang pagkamakasasala, sa ilang kawalay-kalibutan sa ebanghelyo ug sa mga hiyas sa Ginharian, ug sa ilang pagkabangkarotang sosyal ug moral? Unsaon man kaha pagtudlo kanila sa Gugma sa Diyos?</p>	<p>Ang Diyos Amahan nahigugma pag-ayo sa kalibutan nga iyang gimugna ug maong iyang gipadala ang iyang Bugtong Anak aron luwason ang tanang binuhat pinaagi sa pagpasaylo, pagpakig-uli ug kinatibukang pagbag-o. Gigasa kanato sa Amahan ug Anak ang Espiritu Santo nga magbalaan ug magbag-o sa dagway sa kalibutan.</p>

Padayag sa Pagtoo

P: Nagatoo ako...

K: ...Sa Dios ang Amahan ang makagagahum sa tanan, Magbubuhay sa langit ug yuta; nagatoo ako kang Jesukristo, ang Iyang bugtong Anak, atong Ginoo. Gipanamkon Siya sa lalang sa Espiritu Santo, (*Moyukbo ang tanan*) ug natawo gikan ni Maria nga Ulay. Nag-antos Siya sa sugo ni Poncio Pilato, gilansang sa krus, namatay ug gilubong. Miadto Siya sa mga nangamatay. Sa ikatulong adlaw nabanhaw Siya. Misaka Siya sa langit ug nagalingkod sa too sa Dios, ang Amahan, ang makagagahum sa tanan. Mobalik Siya aron paghukom sa mga buhi ug sa mga minatay. Nagatoo usab ako sa Espiritu Santo, sa santos ug Katoliko nga Simbahan, sa pagpasaylo sa mga sala, sa pagkabanhaw sa lawas, ug sa kinabuhing walay katapusan. Amen.

Mga Katilingbanong Pag-ampo

P: Mga hinigugma kong mga igsoon, mapahiubsanon kitang mangayo sa atong Amahan sa mga grasya nga atong gikinahanglan aron makaapil kita sa mahigugmaong komunyong sa Santisima Trinidad diha sa atong mga buhat sa paghinigugmaay ug solidaridad sa tagas-tagas ug sa tanang binuhat. Sa mata'g pag-ampo, kita motubag: Ginoo, itudlo kanamo ang solidaridad ug komunyong.

T: *Ginoo, itudlo kanamo ang solidaridad ug komunyong.*

L: Mag-ampo kita alang sa Simbahan: nga isip Simbahan sa Kabus sa tibook kalibutan, iya untang ipadayon ang pagsangyaw ug paglamdag sa tanang katawhan bahin sa gugmang madapigon sa Diyos ngadto sa mga kabus ug sa mga adunahang naghinulsol sa ilang mga sala. Mag-ampo kita sa Ginoo.

T: *Ginoo, itudlo kanamo ang solidaridad ug komunyong.*

L: Alang sa atong Santo Papa Francisco I, sa mga obispo, pari, diyakono, kanilang nanagpuyo sa kinabuhing konsagrado ug sa tanang gitugyangan sa pag-amoma ug

pagdumala sa Simbahan isip Katawhan sa Dios: nga ila untang ipadayon ang pagtukod ug mga espesyal nga programa alang sa mga gisakitan, sa mga gipadaplin, sa mga uyamot, sa mga kababayan-an ug mga kabataan, sa mga kabus sa mga materyal nga mga butang ug sa mga adunahan nga midawat sa ilang pagkamakasala, sa ilang kawalay-kahibangkaagan mahitungod sa Ebanghelyo ug sa mga bili sa Gingharian, ug busa, sa ilang pagka-bangkarotang sosyal ug moral. Mag-ampo kita sa Ginoo.

T: Ginoo, itudlo kanamo ang solidaridad ug komunyon.

L: Alang sa mga lideres sa kalibutan ug sa tanang gitugyanan sa pangagamhanan ug pagdumala sa mga butang sa kalibutan: nga ila untang paluyohan ug ipahitabo ang sistema sa edukasyon nga mogamit sa tanang mga siyensya aron ipalambo ang tinguha sa mga kabus, ang epektibong paghigugma sa katawhan ug ang pag-amoma sa tanang binuhatan. Mag-ampo kita sa Ginoo.

T: Ginoo, itudlo kanamo ang solidaridad ug komunyon.

L: Alang kanatong tanan, mga lumulupyong sa kalibutan ug sakop sa kalangitan: nga ato untang pasalamatang pag-ayo ang mga amahan ug kadtong hapit na ma-amahan ug dasigon ug tabangan silang mahigugma ug manalipud sa kinabuhi gikan sa pagsabak hangtud sa natural nga kamatayon, ug nga tudloan usab unta nila ang ilang mga anak kon unsaon sa pagsunod kang Jesukristo pinaagi sa ilang kinabuhing panig-ingnan sa kaligdong ug katarung. Mag-ampo kita sa Ginoo.

T: Ginoo, itudlo kanamo ang solidaridad ug komunyon.

L: Alang sa atong mga minahal sa kinabuhi nga milalin na: nga diha sa kapasayloan sa ilang mga sala, maila na unta ang pahulay nga dayon diha sa kasingkasing sa atong Ginoo ug Manluluwas, si Jesukristo. Mag-ampo kita sa Ginoo.

T: Ginoo, itudlo kanamo ang solidaridad ug komunyon.

L: Alang sa atong mga espesyal nga mga tinguha, sa kahilom sa atong tagsa-tagsa ka kasing-kasing, (*mohilum kadiyot*) Mag-ampo kita sa Ginoo.

T: Ginoo, itudlo kanamo ang solidaridad ug komunyon.

P: Ginoong Diyos, mao kini ang mga pag-ampo nga among gipadangat kanimo karon. Nagpasalamat kami kanimo tungod sa gasa sa among mga apohang lalaki, sa among mga amahan ug sa mga umaabot pang mahimong mga amahan. Nagahangyo kami kanimo nga tabangan mo kaming makadayeg ug makasunod sa dalan ni Jesukristo, diha sa imong paghimo kanamong mas amgo sa imong maaghop ug tiunayng gugma dinhi sa among kinabuhi ug sa pagpadilaab sa among mga kasingkasing sa kalayo sa pagbag-o ug kabalaan nga ang Espiritu Santo lamang ang makahatag. Kini among gipangayo pinaagi ni Kristo atong Ginoo.

T: Amen.

LITURHIYA SA EUKARISTIYA Paghalad sa mga Gasa

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang pan nga abut sa yuta ug ginama sa kamot sa mga tawo. Mahimo kini nga kalan-on sa kinabuhi alang kanamo.

K: Daygon ang Dios hangtod sa kahangturan.

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang bino nga abut sa yuta ug ginama sa kamot sa mga tawo. Mahimo kini nga ilimnon nga espirituhanon alang kanamo.

K: Daygon ang Dios hangtod sa kahangturan.

P: Mga igsoon, pag-ampo kamo, aron ang ako ug ang inyong sakripisyo dawaton unta sa Dios nga Amahan,

makagagahom sa tanan.

K: Dawaton unta sa Ginoo ang sakripisyo gikan sa imong mga kamot; alang sa pagdayeg ug paghimaya sa iyang ngalan, alang usab sa atong kapuslanan ug sa tibuok niyang santos nga Simbahan.

Pag-ampo Alang sa Mga Halad

P: Pagabalaana pinaagi sa among pagsangpit sa imong ngalan, naga-ampo kami, O Ginoo ug among Diyos, kining mga halad sa among pag-alagad, ug pinaagi niini, himoa kaming halad nga walay katapusan alang kanimo. Pinaagi ni Kristo among Ginoo.

K: Amen.

Prepasyo

P: Ang Ginoo maanaa kaninyo.

K: Maanaa usab kanimo.

P: Ibayaw ang inyong mga kasingkasing.

K: Amo nang gibayaw ngadto sa Ginoo.

P: Magpasalamat kita sa Ginoong atong Dios.

K: Angay ug matarong.

P: Angay ug matarung gayud, sibo ug makaluwas, kanunay ug sa tanang dapit nga magpasalamat kami kanimo, Ginoo, santos nga Amahan, labawng makagagahom ug walay-kinutubang Diyos.

Kay uban sa imong Bugtong Anak ug sa Espiritu Santo ikaw usa lamang ka-Diyos: dili sa kahiusahan sa usa ka persona, kon dili sa Trinidad sa usa ka sustansya.

Tungod kay unsa man gani ang imong gipadayag kanamo bahin sa imong himaya, among gitoohan nga mao man usab, patas sa imong Anak ug sa Espiritu Santo, aron nga, sa pagpadayag sa tinuod ug tunhay nga Pagka-Diyos, yukboan ka unta kon unsa man ugaling ang angayan sa matag Persona, sa ilang kahiusahan sa sustansya, ug sa ilang igwalidad sa kamahalan.

Kay kini gidayeg sa mga Anghel ug mga

Arkanghel, sa mga Kerubin usa bug sa mga Serapin, nga sa walay hunong nagasinggit sa matag-adlaw, sa usa lamang ka tingog , sa ilang pag-ingon:

Santos

K: Santos, Santos, Santos nga Ginoo, Dios sa kagahaman. Puno ang langit ug yuta sa imong himaya. Osana sa kahitas-an. Dayegon ang nagaanhi sa ngalan sa Ginoo. Osana sa kahitas-an.

Pag-ampo sa Eukaristiya

(Human sa konsagrasyon, ang aklamasyon:)

P: Kini ang misteryo sa pagtoo.

K: Sa mata'g kaon namo niining Pan ug mata'g inom namo gikan niining Kalis, among gisangyaw ang imong Kamatayon, O Ginoo, hangtud sa imong pagbalik pag-usab.

(Sa pagtapos sa Pag-ampong Eukaristiko, ang pari moingon:)

P: Pinaagi kaniya, uban kaniya ug diha kaniya, gihatag nganha kanimo makagagahom nga Amahan, diha sa kahiusa sa Espiritu Santo ang tanang dungog ug himaya hangtod sa kahangturan.

K: Amen.

Rito sa Pangalawat

P: Karon mag-ampo kita sa Amahan, atong gamiton ang mga pulong nga gitudlo kanato sa atong Manunubos.

K: Amahan namo, nga anaa sa mga langit, pagdayegon ang imong ngalan, umabot kanamo ang imong ginharian, matuman ang imong pagbuot dinhi sa yuta maingon sa langit. Ang kalamon namo sa matag adlaw, ihatag kanamo karong adlaw ug pasayloa kami sa among mga sala, ingon nga nagapasaylo kami sa mga nakasala kanamo, ug ayaw itugot nga mahulog kami sa panulay hinonoo luwasa kami sa dautan.

P: Mangayo kami kanimo, Ginoo, nga imo kaming luwason sa tanang

dautan. Hatagi kami sa kalinaw niining panahona, aron, tinabangan sa imong kalooy, mahalikay kami kanunay sa sala ug mahilayo sa tanang kasamok, samtang nagapaabot kami nga malaumon sa pagbalik ni JesuKristo, among manunubos.

K: Kay imo man ang gingharian/ ug ang gahom ug ang himaya/ hangtod sa kahangturan.

P: Ginoong JesuCristo, nag-ingon ka sa imong mga Apostoles, “Ang kalinaw ibilin ko kaninyo, ang akong kalinaw ihatag ko kaninyo.” Ayaw tan-awa ang among mga sala, kondili ang pagsalig sa imong Simbahan ug sibo sa imong kabubuton hatagi kami sa imong kalinaw ug kahiusa, Ikaw nga buhi ug hari hangtod sa kahangturan.

K: Amen.

P: Ang kalinaw sa Ginoo sa kanunay maanaa kaninyo.

K: Maanaa usab kanimo.

P: Ipakita ta ang atong panag-inigsoonay.

Kordero sa Dios

K: Kordero sa Dios nga nagawatang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, hatagi kami sa kalinaw.

Pangalawat

P: Kini mao ang Kordero sa Dios nga nagawagtang sa mga sala sa kalibutan. Bulahan ang gidapit alang sa panihapon sa Ginoo.

K: Ginoo, dili ako angay nga mokalawat kanimo, apan ipamulong lamang ug mamaayo ako.

Pag-ampo Human sa Pangalawat

P: Mag-ampo kita: Hinaut nga ang pagdawat namo niining Sakramento, O Ginoo ug among Diyos, maghatag kanamo ug kahimsog sa lawas ug kalag, samtang among gisangyaw ang imong walay katapusang balaang Trinidad ug dimabahing Kahiusahan. Pinaagi ni Kristo

among Ginoo.

K: Amen.

Katapusang Panalangin:

P: Ang Ginoo maanaa kaninyo.

K: Maanaa usab kanimo.

P: Moduko kita ug atong dawaton ang bendisyon sa Ginoo: Panalanginan unta kamo sa Ginoo ug iyang pagatipigan.

K: Amen.

P: Dan-agan unta kamo sa iyang panagway ug ipakita niya kaninyo ang iyang kalooy.

K: Amen.

P: Iya untang iatubang kaninyo ang iyang nawong ug ihatag niya kaninyo ang iyang kalinaw.

K: Amen.

P: Ug ang mga panalangin sa labawng makagagahum nga Dios, ang + Amahan ug Anak ug ang Espiritu Santo, mokunsad unta diha kaninyo ug magpabilin diha kaninyo kanunay.

K: Amen.

Pagpanglakaw

P: Panglakaw kamo diha sa kalinaw, ug himayaa ang Ginoo sa inyong kinabuhi.

K: Salamat sa Dios. ■

Ubani si Fr. Ben Alforque, MSC sa Missionaries of the Sacred Heart sa iyang **GOSPEL BREAK**, hamubo apan makalingaw nga video mahitungad sa Ebanghelyo karong Dominggo. Bisitaha ang gospelbreak.wordpress.com. o pinagi sa inyong smartphone o tablet i-swipe kini nga QR code.

